

I TASAPA QUYÈ PLORÆ

I tsapaa dejareyti
Avoe vèen pa mei na dzin
Ploeure, tota mancoureyti :
« Uon me vindre po d'ardzin ! »

Ora i yan na bèa elije,
Veyio proeu quyè chè de troà ;
Tey créâ, morale grije,
E to chin quyè bale bâ.

Chéi coume na vieli groûcha,
Na violette decrepeyti ;
Ora i pèrda e pa grôcha
De hla anchyan na ecreleiti

Portan n'in itâ d'accô,
Tan de j'héivéi e de fourtin
Avoe e vivin e avoe e mô,
Tan de j'oeuton e de tsâtin !

Can vo vignechéi préé,
Vo recheô coume na mare,
E vo uri vo je debréé
Can i mama che compare !

Ora tigne tan pou de plache,
Ya méi qu'i cou derën o cô
Què ba pou, e che quyè pâche
M'avoui pa queryâ à chocô.

Portan, chéy arma du veâdzo.
Chôplé, chôplé, fô me voardâ !
Vo arei toutoun pa o coradzo
De m'achyè bayè bâ.

I tsapaa dejei dinche
Ma plorin oeutre p'a né
E po chouéi derën etinche
Ploraë éivoe du borné !

Ché di Bôrne